



责任审校 胡智勇

本期收录 2025 年度助力第五届湖南旅游发展大会怀化荆坪古村采风作品，以及全国诗词名家“走进娄底”采风，馆员、研究员及湖南省文史研究馆诗赋研究会会员作品，共计 78 首。

助力第五届湖南旅游发展大会
怀化荆坪古村采风作品

余德泉

题古驿站联

三省邮传经古驿，
几朝物运伴清铃。

题文昌阁联

文运益昌，文星益灿；
阁名长显，阁道长荣。

熊治祁

书院大门联

富藏典籍传文脉，
畅饮茶咖净客心。

供销社门口联

一盏清茶怀往事，
几间老屋话新潮。

陈书良

赐吉简餐

山水熙熙争赐吉，
杯盘草草佐加餐。

库迪咖啡

独枕行囊贪叠翠，
相逢意气饮咖啡。

覃明德

萃馆奶茶吧

清江涵月虚还有，
碧树当门老便奇。

茶隐酒肆

驿道蹄声敲历史，
水村雉戏入新猷。

吕可夫

中方县文化馆

县史溯千年，文脉一条沅水；
村声传四海，风情万种荆坪。

荆坪古村古琴馆

明月清风，高山流水；
宫商振铎，弦管绕梁。

楚石

题怀化湘沪名居·池渊

池上风清明月夜，
渊中鱼乐碧云天。

题怀化湘沪名居·涉阶

满室书香同夜话，
一庭月醉锁工坊。

张建明

荆坪古井

小饮甘泉，便作龙门之鲤；
闲摩旧迹，疑闻宋井之声。

番茄家轻食民宿

茶食关心，非番茄独擅，
精新恰意，舍此刻难求。

傅小松

题荆坪古村古井农家

古井泉甘，千年树木饶生气；
农家味美，十里风烟醉远宾。

题石鱼农家

石跃灵鱼，报福禄寿喜；
院藏古韵，如水墨丹青。

谢宏治

沪湘名居·涉阶

苑绕山花红晓日，
阶延驿柳绿春风。

沪湘名居·荆扉

荆门浅醉云中月，
玉竹轻摇柳畔扉。

周永红

兵鑫农庄

花径迂莺，柳营展骥；
荆坪脍鸭，蓬岛来骖。

金九农家乐

斗酒唤天鸡，青莲对饮；
囊诗邀野鹤，绿绮佐餐。

罗冈

题怀化荆坪古村玫瑰农家乐

农家色看玫瑰艳，
游客声寻鼎鼐香。

题怀化荆坪古村群发楼

群峰掩映新枝发，
廿载经营远客来。

陈樵哥

古岩农家乐

土鸡村酒闻香醉，
山笋溪芹带露烹。

平安民俗

面壁分香，栽梧引凤；
开园撷翠，抱朴归真。

石印文

题怀化中方县中方镇荆坪古村平安民宿

村宿如家，平居有乐；
门墙最古，安处无虞。

题怀化中方县中方镇荆坪古村琴庐民宿

迎远客探幽，琴横郑舍；
有宸颜顾曲，韵洽潘庐。

皮元珍

题开心农庄

四方山色中方好，
诸店食材此店鲜。

题金芳农家乐

长廊十里三壶酒，
古木千年一片春。

吴晓辉

云舍咖啡馆

且唤风回头，斟杯茗薜；
来寻云落脚，煮盏咖啡。

贺迎辉

题荆坪古村柚见图书馆

晴雨随心，相期胜友，
诗书在手，如对佳人。

鲁晓川

荆坪村平居茶馆

老舍茶迎新旧雨，
平居心共往来云。

全国诗词名家“走进娄底”采风，馆员、研究员及
湖南省文史研究馆诗赋研究会会员作品

熊东遨（8首）

登紫鹊界

别样形神具，毋劳画笔全。
片红低炫谷，层绿上摩天。
运逐农耕改，珠随岁月圆。
考求凭一耜，认取汉唐前。

过杨家滩

途渴方思解，青帘隔岸招。
水声凉到骨，花影叠如潮。
所遇皆从善，何忧不可消？
风光供过眼，留迹在溪桥。

冷水江波月洞

莫讶奇观幻化频，赏游快意在天真。
世间多少清凉境，不属妖精便属神。

浣溪沙·湄江写意

非雨非晴亦妙哉，一川峰影在烟霾。美人心事不须猜。
偶过湖亭思故旧，未因孤寂减和谐。开窗放入鸟声来。

浣溪沙·重过曾文正故居

旧迹重寻一一经，藕池芳榭绿杉亭。百年人去恁无声。
星斗在天光在水，烟岚为帐树为屏。泰平时节不谈兵。

浣溪沙·天籁寺茗坐

一炷檀香一卷经，空庭坐到月华明。偶然回味及前生。
饮罢乐随松竹舞，吟成自有鹤猿听。者般参悟问谁能？

浣溪沙·胜梅桥书感

记得乡贤旧姓姚，石虹亲驾出烟郊。我来回看百年潮。
小寄蜉蝣天是壳，神游上古梦为桥。更余何俗不能抛？

题药王庙

泉石在山闻法久，
草花成药惠人多。

陈樵哥（11首）

大熊山

物种基因库，湘中第一山。
林深隐云豹，径曲绕溪泉。
风景四时异，农桑累代传。
偶来奇妙境，春意正盎然。

过紫鹊界

妙造无今古，丹青出自然。
层梯铺绿野，峻岭上青天。
百代声名壮，三千蝶梦圆。
云车经涧谷，驻足听流泉。

临江仙·梅山龙宫

峡谷峰林溶洞，暗流绝壁溪河。小舟漫与俯身过。龙宫真秘府，阆苑幻陵螺。

满目奇珍堆叠，九层瑶阙嵯峨，怪疑兜率谒弥陀。亿年滋法乳，万象梦南柯。

游湄江地质公园

洪荒剖出玉嶙峋，裂海崩崖现此身。
曾记仙人长触折，幸从诗客重逡巡。
群峰插汉回云阵，古磴通幽避劫尘。
回望连绵三百里，昆仑高并属何人。

登湄江凌云渡玻璃栈道

天梯凌绝壁，鸟道下深溪。
俯仰杳无竟，身心空所依。
振衣云片片，蹑足汗微微。
花影迷崖嶂，清风不欲归。

巫山一段云·波月洞

世外神仙府，云间蜃气楼。琼花玉树画中收。拂幔辨源流。
东作蓬莱渡，西为天竺游。法华参破失珠旒。一忘古今愁。

登龙山主峰岳坪顶

嵒崎直到药祠边，百转方开眼界全。
云涌峰移驰骏马，日回钟响谒神仙。
行吟此夕三湘见，遁隐何人百疾蠲。
回首风车空簌簌，鹤飞松老不知年。

杨家滩湘军故里

古镇龙山下，遗风溯九黎。
八门朝日月，一水泽东西。
湘勇饶兵将，龙骧振鼓鼙。
世衰终不济，故第草萋萋。

三谒白玉堂

高岬云气到庭前，黛瓦高墙荫椽椽。
闻说紫藤花放日，异芳掩敛冠群妍。

富厚堂

三湘高府第，砥柱想经纶。
挥斥风云际，纵横龙虎身。
文章并衡岳，儒脉近完人。
富厚堂前草，春光又日新。

蔡和森故居

粉墙光甲堂，青瓦郁书香。
星火辉长夜，文心肇政纲。
求真向中外，抱壁对刀枪。
春树檐前绿，无言吊夕阳。

胡智勇（10首）

鹧鸪天·大熊山景区

叠嶂摩天势欲吞，烟岚深处遍遗痕。
松涛漫卷千重浪，涧水闲看万里云。
穿雾径，叩山门，禅音蘸破半山昏。
忽逢绝顶风来急，吹散人间一点尘。

虞美人·紫鹊界梯田

层岩裂作星河缕，耕影衔云去。千年叩石认苔痕，恍见愚
公斤斧、凿青旻。

山田不借天河注，自有春膏聚。汗凝阡陌化烟岚，漫把人
间辛苦、聚成潭。

鹧鸪天·梅山龙宫

地窟谁开白玉京，琼田钟乳幻阴晴。
石笋暗奏清平乐，银瀑斜垂太古冰。
光错落，影峻嶒，潜龙或恐是曾经。
幽潭忽现星槎迹，疑有仙人夜采苓。

七律·波月洞探幽

石乳垂帘映月寒，暗河九曲化飞湍。
晶荧鹅管悬天笔，怅望栏杆挥泪滩。
白骨成尘空卧榻，灵猴跃影旧衣冠。
洞天多少痴情事，终作清辉壁上看。

五律·龙山揽胜

龙脊接苍冥，葱茏入画屏。
风车摇日月，药气绕阶庭。
石径通幽远，云泉漱翠冷。
登临浑忘我，天地一浮萍。

鹧鸪天·涟源龙山春行

万壑晴岚染翠绡，岳坪台上雾初消。
野桃破萼分岩色，溪涧鸣琤过板桥。
莺语滑，蝶魂娇，药王遗迹认前朝。
踏青人在烟霞里，折得瑶枝作玉箫。

七绝·过杨家滩

雕梁庭院掩沧桑，剑气销磨岁月长。
唯有滩头东逝水，至今犹唱战歌扬。

七律·湄山珍珠潭飞瀑

山势冲云劲未休，银河倒泻自天流。
千堆雪浪吞岩岫，四壁雷声响涧丘。
雾锁危峰遮远黛，虹垂绝壁映晴柔。
凭栏忽觉童心盛，欲戏清波作畅游。

蝶恋花·过曾国藩故居

苔锁重门深几许，黛瓦青砖，曾砥中流柱。半壁残阳移旧础，
当年剑气沉荷浦。

一纸家书销战鼓，耕读楼头，月洗千帆去。阶下游人犹絮语，
红尘换尽公如晤。

绝句·过蔡和森旧居

石阶曾踏少年郎，报国何辞剑气霜。
一卷风云青史在，至今犹带墨花香。

贺迎辉（9首）

湄江栈道

熏风拂过不沾埃，拾级凭栏大快哉。
百鸟留人争奏乐，数峰迎面送青来。

山花处处红燃火，峭壁层层绿覆苔。
坐赏松间云气起，待攀前路莫徘徊。

湄江仙人洞访珍珠潭瀑布

泉声隐隐绕山周，小径幽深鸟语啾。
泻玉长悬三叠瀑，有松如伏数条虬。
能参云霭无拘管，便识尘寰大自由。
笑语同行二三子，簪花直欲展歌喉。

熊山寺古银杏

此木寿中王，凛然高且直。
惯经雨雪浇，颇耐风霜蚀。
父老口争传，蚩尤手自植。
何堪辨实虚，粉面聊相饰。

富厚堂

猎猎风扬大帅旌，荷塘蛙鼓掩禽鸣。
侯门富贵流云杳，老柏森阴战阵惊。
卫道卫清何所谓，是妖是圣不分明。
嗟吁石罅无名草，百十年间败复荣。

紫鹊界

层层还叠叠，山麓到山巅。
袖卷收青霭，风回带响涓。
声闻瀛海外，史溯汉秦前。
悟得耕耘乐，秋来赏稻粘。

杨家滩湘军故里三首

其一

楼台高耸晚风轻，想见当年出令名。
槛外斜晖照流水，这般颜色血浇成。

其二

掳尽东南百战休，宝船连轴蔽江流。
从知乱世耕和读，不及提刀学剃头。

其三

缺甌忍见汉江山，相率西征去不还。
等是寻常夫与子，秋风铁马识儿男。

龙山药王庙

千年秦制究如何，恶政之于疠瘴多。
德术遥承贤太守，治民先必解民疴。

杨宗义（9首）

过杨家滩湘军故居群二首

其一

流水响前滩，畝田围故山。不知千里月，曾照几人还。
门巷马何在，觚棱鸟自攀。有劳新业主，涂抹壁苔斑。

其二

罗李当时辈，千村拢骊骖。风云劲草白，湖海战旗黄。
旧国空残垒，留人吊夕阳。桥头青薜荔，特地曳浮光。

夜宿涟源龙山宾馆二首

其一

薄暮龙山道，随车入翠微。
林风深涧出，池水众峰围。
采药人何去，烧丹梦已非。
遥岑古殿在，香炷袅崔巍。

其二

游踪许熟歇，虚馆纳清风。
月出人家静，山环树影重。
偶然听虫鸟，已觉脱樊笼。
明日攀林径，烟霞应不穷。

登龙山药王殿

危磴青峰上，古祠高倚天。
如何丹灶外，长有紫云悬。
万壑行曾遍，千金惠已先。
群生緬遗泽，汨汨见灵泉。

登新化北塔

一塔巍然在，千山入望空。
耸乎桃李世，有纳自由风。
磨级古人履，残碑何日功。
江声聊共倚，北去意无穷。

题大熊山古银杏

莫问熊山树，愚顽多少年。
风摧心不动，霜打体愈坚。
俯仰只如是，荣枯任自然。
钟声绕冠盖，若溉祖翁田。

暮春过湄江二首

其一

眉峰舒展眼波回，隐约仙人洞府开。
亦欲武陵舟上坐，清风为送落英来。

其二

路缘溪岸几迂回，花不知名随处开。
未解清流出山意，风尘客已入山来。